

INUIT ATAQATIGIIT INATSIARTUNI



UKA2024/55

12.11.24

Edvard Nielsen Aronsen

Nunatsinni umiartortunnngorniarnermi ilinniarfiusinnaasut suulluunniit tamarmik illoqarfimmut ataatsimut, ilinniarfimmullu ataatsimut ataatsimuulersinneqassagaluarpata pitsaaqutigisinnaasaanik pitsaanngequtigisinnaasaanillu aammalu aningaasatigut kingunerisinnasaanik misissueqqillugit Naalackersuisut peqquneqarnissaannik Inatsisartut aalajangiiffigisassassaattut siunnersuut. Maskinmesterinngorniartarnerup imarsiornerermik ilinniarfiup iluaniilernissaa soorluttaaq nunatsinni umiarsuup naalagaatut ilinniartitsisoqartalersinnaanera misissugassanut ilaassaaq.
Misissuineq naammassereersimassaaq UKA25 sioqqullugu.

(Inatsisartunut ilaasortaq, Peter Olsen, Inuit Ataqatigiit)

Oqaaseqaat :

Inuit Ataqatigiit ilinniartitaaneq inuiatigiit patajaatsumik ingelaneranni qitiulluinnartutut isigaat. Innuttaasut inuiaat ingerlanerat sunniuteqarfigalugu siuuttuuffigisappassuk ilinniartitaaneq tamatunnga qulakkeerinnittussaasoq Inuit Ataqatigiit isumaqarpugut.

Ilumoorpoq 1979-imi namminersornerulluni oqartussaanerup 2009-milu namminersorluni oqartussaanerup eqqunneqarnerata siunertaasa ilagigaat ineriartornerup iluani isiginnaartuunnarata aqutsinikkut, inuussutissarsiornikkut, minnerunngitsumillu ilinniartitaanikkut akisussaaffimmik annerusumik tiguserusunnerput. Taamaattumik Inuit Ataqatigiinnit isumaqarpugut pisussissamisoortoq imarsiornerup iluani ilinniartitaanikkut aaqqissuussisimanerput ilumut ullumikkumut naleqqunnersoq aamma nalilersussallugu.

Siunnersuuteqartup ujartorpaa imarsiornerup iluani ilinniartitaanikkut siuarsaanitsinni sukataarnerullutalu pitsaanerusumik angusaqarniarnissarput, ilaatigut Sermitsiaq AG-p nittartagaani ulloq 13 december 2018-imi tikkuarneqarsimammat kalaallinik umiarsuup naalagaatut ilinniarsimasunik nunatsinni amigaateqartugut tamatumalu kingunerisaanik Savalimmiormiunik atuisariaqarnerup pingaarutaanik. Taamaammat Inuit Ataqatigiinniit isumaqarpugut pisussissamisoortoq ullumikkut nalilersussallugu ilumut

INUIT ATAQATIGIIT INATSISARTUNI



taamaatut ingerlaannarusunnersugut imaluuniit umiarsuarmi naalakkatut
ilinniartitaanerup nutarteriffigineqarluni aamma nunatsinni
ilinniarsinnaalernissap atuutilersinnissaanut periarfissat suunersut
nalilersorusunnerigut. Tassami nunatsinni imarsiornermi ilinniarfimmi
ullumikkut ilinniarneqarsinnaasoq qaffasinnerpaaq tassaavoq fiskeskipper
1.grad, tassungaannarlu killikkusuppugut ? Soorluuna annertusaanissaq
pisariaqalersimasooq aamma aqumiut kalaalinngorsarnissaannut. Taamaammatt
Inuit Ataqatigiinniit isumaqarpugut alloriarneq tulleeq tassaasariaqartoq
nunatsinni umiarsuup naalagaatut ilinniarnernerup eqqunneqarsinnaanerata
pitsaaqutaata pitsaanngequtaatalu nalilersornissaa, nalilersuisooqareerneratalu
kingorna paasisat aallaavigalugit nunatsinnut pitsaanerpaamik
alloriartoqaqqinnissaa.

Kiisattaq siunnersuuteqartup ujartorjaa nalilersorneqassasoq
Maskinmesterinngorniartarnerup imarsiornermik ilinniarfimmu
inissinneqarnissaata pitsaaqutaata pitsaanngequtaatalu
qulaajarneqarneqarnissaat. Tunngavilersuummini ilaatigut tikkuarpaa
Savalimmiuni maskinmesterinngorniartarnerup imarsiornermik ilinniarfimmu
nuunneqarsimanerata kingunera pitsaasuusimasooq, tassungalu atatillugu
nunatsinni aamma taamaaliortoqarsinnaanera siunnersuuteqartumik
paaserusunneqarluni, tamannalu Inuit Ataqatigiinniit ilalernartipparput.

Nalunngilarput nunatsinni inuussutissarsiutini aalisarneq pingaarnarpaasoq,
aammalu siunnersuuteqartutut isumaqarluta kilisaatini inuttaasut, aqumiut,
kilisaassuarnilu aquttut naalakkallu amerlanerpaat kalaaliusariaqartut.
Taamaattumik kilisaatini inuttat amerlanerpaartaasa kalaaliunissaannik
kissaateqaratta pingaartipparput nunatsinni imarsiornermik ilinniarfiup
ilinniartitaanikkut ullutsinnut naleqqussaavigineqarnissaa. Tassani
annaasassaqaanngilagut, parlattuanillu isumaqarpugut taamaaliornikkut
pitsaasup tungaanut alloriassasugut.

Naalakkersuisut imarsionikkut ilinniarfiit ataatsimuulersinneqarnissaat
isumaqataaffigigaat akissuteqaataanni atuarneqarsinnaavoq, ilaatigut
tikkuarlugu Naalakkersuisut ilinniartitsinermut periusissiaanni aammalu
Attassiinnarnissamut ineriartortitsinermullu pilersaarut 2-mi tamanna
erseqqissarneqarsimasooq.

Aammattaq Naalakkersuisut akissuteqaataanni maluginiarpara imarsionikkut
suliffeqarfimmi ilinniarsimasunik sulisoqarnikkut pisariaqartinneqartut
nunaqavissuunissaat pingaarutilittut kissaatigigaat. Tamanna soorunami
tusarluarnarpoq aammalu tapersernarluni.

INUIT ATAQATIGIIT INATSIARTUNI



Taamaattumik Naalakkersuisut akissuteqaammini toqqammavigisai
soqutiginartut aallavigalugit siunnersuuteqartullu siunnersuummini
tunngavilersutai imminnut qaneqimmata Inuit Ataqatigiinniit
siunnersuuteqartup siunnersuutaa Naalakkersuisullu allannguutissatut
siunnersuutaat sukumiisumik nalilersorneqaqqullugit siunnersuutit marluk
ataatsimiisitaliamut susassaqartumut ingerlateqqippagut neriutigalugu
angusaqarfiulluartumik nalilersorneqarlutik suliaqartoqarumaatoq.